

## **MEMORANTAMO WA MOLAOKAKANYWAPHETOŠWA WA BONGBODULO BJA MEAGOKABELANO WA 2020**

### **1. DINEPO TŠA MOLAOKAKANYWA**

Molaokakanywaphetošwa wa Bongbodulo bja Meagokabelano wa 2020 ("Molaokakanywa") o nyaka go fetoša Molao wa Bongbodulo bja Meagokabelano wa 1986 (Molao wa bo-95 wa 1986) ("Molao") go —

- (a) fetoša ditlhaloso tše itšeng;
- (b) kgontšha mohlabolli go araba dipotšišo tšeo a di botšišwago ke baemedi ba bahiri;
- (c) tšwela pele go kgontšha phetošo ya dipolane tša meagokabelano go ya le ka mafelo ao a šomišwago ke batho ba itšego feela;
- (d) tšwela pele go kgontšha phetošo le phumolo ya polane ya moagokabelano go ya ka taelo ya kgorotsheko;
- (e) kgontšha go lemogwa ga bongbodulo go ya ka go fela ga peelo, go ya le ka mabaka a karolo 25;
- (f) kgontšha gore go be le lisi ya karolo ya lefelo la go šomišwa ke bohle ka tumelelo ya bengditokelo tša nnete tšeo di ngwadišitšwego;
- (g) fetoša dikgonagatšo tša go amana le go beelwa kgakala ga lefelo la go šomišwa ke bohle;
- (h) tšwela pele go kgontšha phumolo ya karolo ya bonte le lefelo la bonte la go šomišwa ke batho ba itšeng feela;
- (i) gape le go kgontšha mohlabolli go iša polane bakeng sa karoganyo goba kopantšho go Mosabeyapharephare go yo fetišwa gore go aroganywe, go kopantšhwe goba go katološwe karolo;
- (j) katološa go ngwadišwa ga karoganyo ya karolo, kopantšho ya dikarolo, le katološo ya dikarolo go mohlabolli;
- (k) kgontšha go ba le ditokomane tšeo di tsenago legatong la tšeo di timetšego goba di senyegilego;
- (l) fetoša dikgonagatšo tša go amana le katološo ya sekhwama;
- (m) fetoša dikgonagatšo tša go amana le dipalomoka tša kgathotema ya dikarolo
- (n) laola boleloko bja boto ya melawana ya bongbodulo bja meagokabelano; gape le go
- (o) kgonagatša merero yeo e kgokaganego nayo.

### **2. TSHEKATSHEKO YA KAROLWANA KA KAROLWANA**

#### **2.1 Karolwana 1**

2.1.1 Karolwana 1 e nyaka go fetoša karolo 1 ya Molao.

2.1.2 Tlhalošo ya gabjale ya “tšhomišo ya lefelo ka batho ba itšego feela” e dira tšhupetšo go tšhomišo ka botlalo ka “mong goba beng ba karolo e tee goba go feta”. Tlhalošo e ka hlathollwa gape ka mokgwa woo o ka tlogelago ka ntle motho ofe goba ofe ntle le mong gore a se šomiše lefelo leo le šomišwago ke batho ba itšego feela, bjalo ka mohiri, motho yoo a nago le tumelelo ya semolao goba le ge e ka ba molekani wa mongbodulo goba leloko le lengwe la lapa la mongbodulo. Phetošo yeo e šišintšwego ka karolwaneng 1(a) ya Molaokakanywa e nepile go hlakiša seemo sa yona.

2.1.3 Tlhalošo ya “Molao wa Taolo ya Dikhwama tša Bongbodulo bja Meagokabelano” e šupetša, e se ka maleba, gore ke Molao wa 2010. Phetošo yeo e šišintšwego ka karolwaneng 1(b) ya Molaokakanywa e phošolla tsopolo ya “Molao wa Taolo ya Dikhwama tša Bongbodulo bja Meagokabelano”.

## 2.2 Karolwana 2

Karolwana 2 e nyaka go fetiša karolo 4 ya Molao yeo e šomago ka go fetišwa ga dikhwama tša tlhabollo gomme e kgontšha mohlabolli go ba le kopano le mohiri wa moago mabakeng ao karolo ya moago woo, ka moka ga yona goba seripa sa yona, se tlo hirišetšwago batho. Karolo 4(3)(b) e laela mohlabolli go araba dipotšišo ka moka tša maleba go tšwa go bahiri bao ba lego gona kopanong. Tlhokego e hlathilwe, ya go dumelela motho yo mongwe go emela mohiri legato ge moswaralisi a se gona kopanong.

## 2.3 Karolwana 3

2.3.1 Karolwana 3 e nyaka go fetiša karolo 14 ya Molao, yeo e šomanago le phetošo le phumolo ya dipolane tša meagokabelano.

2.3.2 Karolo 14 e lebeletše feela mathata ao a amanago le dikarolo tšeo di amilwego ke dipolane tša meagokabelano tšeo e sego tša maleba. Go na gape le tlhokego ya go katološa mollwane wa karolo 14 gore go akaretšwe mafelo a go šomišwa ke batho ba itšeng feela ao a amilwego ke dipolane tšeo e sego tša maleba tša meagokabelano. Diphetošo tšeo di šišintšwego ka karolwaneng 3(a) le (b) tša Molaokakanywa di nyaka go šomana le seemo se.

2.3.3 Karolo 14(8) ya Molao e kgontšha go phumolwa ga polane ya moagokabelano ka taelo ya kgorotsheko.

Phetošo yeo e šišintšwego e nyaka go hlakiša seemo mabakeng ao bolaodi bja moago bo lego gona gomme kgorotsheko e ntšhitše le taelo ya gore polane ya moagokabelano e phumolwe.

## 2.4 Karolwana 4

Karolwana 4 e nyaka go fetoša karolo 15B ya Molao, yeo e kgontšhago go ngwadišwa ga phetišetšo ya go ba mong ka sekhwameng sa bongbodulo bja meagokabelano. Karolo 15B ya Molao e homotše ge go etla temogong ya go fela ga tokelo yeo e beetšwego go ya ka karolo 25(1) ya Molao. Tlaleletšo ya karolotlaleletšo 1(e), bjale ka ge go šišintšwe ka karolwaneng 4 ya Molaokakanywa, e nyaka go kgontšha temogo ya bongbodulo bja maleba ge kgopelo e fetša go dirwa ke mohlabolli, goba bolaodi bja moago mabakeng ao e lego gore mohlabolli ga a sa le gona.

## 2.5 Karolwana 5

2.5.1 Karolwana 5 e nyaka go fetoša karolo 17 ya Molao, yeo e šomago ka peelothoko le khirišo ya lefelo la go šomišwa ke bohle. Go ya ka karolo 17(4)(b), mongwadiši a ka se ngwadiše lisi ya sekgoba seo se bopago karolo ya lefelo la go šomišwa ke bohle, ntle le ge lisi yeo e dirilwe go ba karolo ya ditokelo ka moka tša mongkarolo. Karolo 17 ga e kgontšhe dilisi gore di be karolo ya ditokelo tša baswaradilisi ba go ba le ditokelo tša nnete go ya ka dikarolo 25 le 27. Phetošo ya karolo 17(4)(b), bjalo ka ge go šišintšwe ka karolwaneng 5(a) ya Molaokakanywa, e nyaka go kgontšha se.

2.5.2 Karolo 17(4B) e kgontšha peelothoko ya seripa sa lefelo la go šomišwa ke bohle leo go lona tšhomišo ka batho ba itšeng feela goba karolo ya lona e ngwadišitšwego. Le ge go le bjalo, go ngwadišwa ga phetišetšo ya lefelo la go šomišwa ke bohle go ka dirwa feela ka morago ga go phumolwa ga tšhomišo ka botlalo ya lefelo, goba karolo ya lona, yeo e lego ka lefelong la go šomišwa ke bohle leo le tlo fetišetšwago gongwe. Molao ga o kgontšhe go šomana le karolo ya lefelo la go šomišwa ke batho ba itšeng. Phetošo yeo e šišintšwego ya karolo 17(4B)(a) le (b), bjalo ka ge e le gona ka karolwaneng 5(b) ya Molaokakanywa, e nyaka go phošolla seemo.

2.5.3 Phetošo yeo e šišintšwego go karolo 17(4C), bjalo ka ge e ngwadilwe ka karolwaneng 5(c) ya

Molaokakanywa, e bohlokwa phetošong ya karolo 17(4B) yeo go bolelwago ka yona ka temaneng 2.5.2.

## **2.6 Karolwana 6**

Karolwana 6 e nyaka go fetša karolo 18 ya Molao, yeo e dirago gore dintlha tša dikarolo 56 le 57 tša Molao wa Mananeo a Boingwadišo bja Bongbodulo wa 1937 (Molao wa bo-47 wa 1937), woo o amegago phetišetšong ya lefelo la bodulo leo le lefelelwago ka bonte mmogo le lefelo la go šomišwa ke bohle la go lefelelwa ka bonte, le go fiwa ga ditokelo tša lisi ya lefelo la bodulo le tokelo ya nnete ya go lefelelwa ka bonte ya lefelo la bodulo. Karolo yeo go boletšwego ka yona, le ge go le bjalo, e homotše ge go etla tabeng ya go phumola, ka tlase ga karolo 17, ga karolo ya go lefelwa ka bonte, lefelo la go šomišwa ke batho ba itšego feela, le ditokelo tša nnete tša katološo. Karolwana 6 e nyaka go kgontšha go akaretšwa goo go hlokegago.

## **2.7 Karolwana 7**

Karolo 21 ya Molao e kgontšha go fetišwa ga dipolane tša meagokabelano bakeng sa karoganyo le kopantšho ya dikarolo. Karolo 21 ga e kgontšhe mohlabolli, pele ga go hlangwa ga bolaodi bja moago, go dira gore mosabeya wa naga goba mothaladipolane a iše sethalwa sa polane ya moagokabelano wa karoganyo goba kopanyo, go ka ba bjang goba bjang, go Mosabeyapharephare gore e fetišwe. Karolwana 7 e nyaka go tsenya karolo 21(1A) ya Molao, go kgontšha mohlabolli, pele ga go hlangwa ga bolaodi bja moago, go dira gore mosabeya wa naga goba mothaladipolane a iše sethalwa sa polane ya moagokabelano wa karoganyo goba kopanyo, go ka ba bjang goba bjang, go Mosabeyapharephare gore e fetišwe.

## **2.8 Karolwana 8**

2.8.1 Karolwana 8 e nyaka go fetša karolo 22 ya Molao yeo e šomago ka go ngwadišwa ga seripatlaleletšo sa karolo. Tsenyo yeo e šišintšwego ya dikarolo 22(1A) le 22(2A) e nyaka go kgontšha mohlabolli go dira dikgopelo tša go ngwadiša polane ya moagokabelano ya seripatlaleletšo sa karolo pele ga go hlangwa ga bolaodi bja moago.

2.8.2 Karolo 22(5) e kgontšha go dumelela mangwalo a bongbodulo ao a ngwadišitšwego kgahlanong le bongbodulo bja karolo gore e bonagatše seripatlaleletšo seo. Le ge go le bjalo, karolo 22(2),

yeo e kgontšhago go tsenywa ga mangwalo a bongbodulo a maleba ka maikemišetšo a go tsenya, go tlogela tšhupetšo ya lisi. Karolwana 8 e nyaka go tsenya karolo 22(2)(cA) gore e kgontšhe go tsenywa ga lisi.

2.8.3. Dikarolwana 8(c) le (d) di nyaka go fetša karolo 22(2)(d) le go phumola karolo 22(2)(e) ya Molao. Karolo 22(2)(d) ya Molao e kgontšha go abja ga ditifikeiti tša mangwalo a bongbodulo bja meagokabelano di fiwe batho bao ba nago le maswanedi a go di hwetša, go ya ka tumelelano ya karoganyo. Le ge go le bjalo, seemo sa maleba go seripatlaleletšo ke gore ditifikeiti tša mangwalo a bongbodulo a meagokabelano ao a ngwadišitšwego di fiwe go ya ka maina a bengyuniti ya mathomo. Diphetišetšo tša karoganyo di ka ngwadišwa morago ga go abja ga ditifikeiti tša bongbodulo bja meagokabelano tšeo di ngwadišitšwego.

## 2.9 Karolwana 9

2.9.1 Karolo 23 ya Molao e šomaka go ngwadišwa ga kopantšho ya dikarolo. Karolwana 9 e nyaka go fetša karolo 23 ya Molao ka go tsenya dikarolo 23(1A) le 23(2A) gore e kgone go kgontšha mohlabolli, pele ga ge bolaodi bja moago bo ka hlangwa, go dira dikgopelo tša go ngwadišwa ga polane ya moagokabelano ya kopantšho ya dikarolo tše pedi goba go feta.

2.9.2 Karolo 23(2) ya Molao e kgontšha tumelelo ya mangwalo a bongbodulo ao a bego a ngwadišitšwe kgahlanong le lengwalo la bongbodulo bja karolo go bonagatša kopantšho yeo. Karolwana 9 e nyaka go fetša karolo 23(2) ya Molao ka go tsenya karolo 23(2)(cA) go akaretša tšhupetšo ya lisi.

## 2.10 Karolwana 10

2.10.1 Karolwana 10 e nyaka go fetša karolo 24 ya Molao yeo e šomago ka go ngwadišwa ga katološo ya karolo ka sekhwameng.

2.10.2 Tsenyo yeo e šišintšwego ya dikarolo 24(3A) le 24(6AA) e nyaka go kgontšha mohlabolli, pele ga go hlangwa ga bolaodi bja moago, go dira gore mosabeya wa naga goba mothaladipolane a iše sethalwa sa polane ya katološo ya karolo go Mosabeyapharephare wa naga bakeng sa phetišo e bjalo.

2.10.3 Karolwana 10 le yona e nyaka go fetša karolo 24(6) ya Molao yeo e kgontšhago ditokomane tšeo di sepelago le kgopelo go ya go mongwadiši bakeng sa go ngwadišwa ga polane ya moagokabelano ya katološo ya karolo, ka go akaretša lisi ka lenaneong la ditokomane leo le swanetšego le sepele le kgopelo yeo go boletšwego ka yona.

## 2.11 Karolo 11

2.11.1 Karolwana 11 e nyaka go fetša karolo 25 ya Molao, yeo e šomago ka katološo ya sekhwama ka tlaleletšo ya dikarolo le mafelo ao a šomišwago ke batho ba itšego feela.

2.11.2 Karolo 25(2) ya Molao e kgontšha, gare ga tše dingwe, go ngwadišwa ga polane ya moago ka lenaneong la boingwadišo la mangwalo a bongbodulo, leo le bontšhago karolo ya lefelo la go šomišwa ke bohle leo le amilwego ke peelo ya go katološa sekhwama, polane yeo e bontšhago mokgwa woo meago e yago go aroganywa ka gona ka dikarolokarolo le mafelo ao a šomišwago ke batho ba itšego feela, le šetulu yeo e laetšago kakanyo ya mokgwa wa kgathotema bakeng sa dikarolo ka moka. Tsenyo yeo e šišintšwego ya karolo 25(2A) e nyaka go kgontšha go ba gona ga ditokomane tšeo di tla tlatšwago sebakeng sa ditokomane tšeo di timetšego goba di senyegilego.

2.11.3 Karolo 25(5A)(a) ya Molao e dira tšhupetšo feela go kakaretšo ya yuniti ka lenaneong la maleba la boingwadišo la mangwalo a bongbodulo. Karolwana 11 e nyaka go fetša karolo 25(5A)(a) gore go akaretšwe le lefelo la go šomišwa ke batho ba itšego feela.

2.11.4 Karolo 25(6) ya Molao e kgontšha bolaodi bja moago go dira kgopelo ya katološo ya sekhwama mabakeng ao go se nago peelo yeo e dirilwego ke mohlabolli go ya le ka karolo 25(1), goba ge eba peelano e bjalo e dirilwe gomme ebile nako ya yona e fetile. Tokelo e bjalo e ka phethagatšwa ke bolaodi bja moago ka tumelelo ya go ngwalwa ya maloko ka moka a bolaodi bja moago le bengdiyuniti ka moka tša ka gare ga sekhwama. Phetošo yeo e šiintšwego ya karolo 25(6) e nyaka go tsenya peelano ya gore bolaodi bja moago bo tla kgona feela go phethagatša goba go phaela ka thoko goba go fetišetša tokelo e bjalo ka tumelelo ya go ngwalwa ya maloko ka moka

a bolaodi bja moago, bengdiyuniti ka moka le ditokelo tša nnete tša diyuniti, mmogo le baswari ba ditokelo tša nnete tšeo di ngwadišitšwego tša diyuniti tša ka sekhwameng, bao ba ka se ganego ka tumelelo e bjalo ntle le lebaka la maleba la semolao.

2.11.5 Diphetošo tšeo di šišintšwego tša dikarolo 25(10)(c) le 25(10)(dA) tša Molao di nyaka go fetšiša pušeletšo ka karolong 25(10)(c) le ka karolong 25(10)(dA) tšeo di kgontšhago go tsenywa le go dumelelwa ga dibonte tšeo di ngwadišitšwego kgahlanong le setifikeiti sa tokelo ya nnete sa katološo.

## **2.12 Karolwana 12**

Karolwana 12 e nyaka go fetoša karolo 26 ya Molao, yeo e šomago ka katološo ya dikhwama ka tlaleletšo ya lebala go lefelo la go šomišwa ke bohle. Karolwana 12 e nyaka go kgontšha tlaleletšo ya dikarotlaleletšo (8) le (9) gore e kgone o kgontšha mohlabolli, pele ga go hlangwa ga bolaodi bja moago, go dira dikgopelo tša go ngwadišwa ga polane ya katološo ya lefelo la go šomišwa ke bohle.

## **2.13 Karolwana 13**

Karolwana 13 e nyaka go fetoša karolo 27 ya Molao ka go tsenya karotlaleletšo (5A) gore e kgone go kgontšha mohlabolli, pele ga ge bolaodi bja moago bo ka hlangwa, go phumola ditokelo tša gagwe tša go šomiša dikarolo tša lefelo la go šomišwa ke batho ba itšego feela go ba lefelo la go šomišwa ke bohle. Molao o homotše tabeng ya go phumolwa ga ditokelo gore di šomišwe ke bahlabolli feela.

## **2.14 Karolwana 14**

Karolwana 14 e nyaka go fetoša karolo 32 ya Molao, yeo e šomago ka dipalomoka tša kgathotema ya dikarolo. Dikarolo 32(1) le (2) di na le ditlhalošo mabapi le kgonagatšo ya dipalopalo tša kgathotema gomme di fa ditlhalošo tšeo go ya ka karolo 48 ya Molao. Karolo 48 ya Molao e fetotšwe ka Molao wa Taolo ya Dikhwama tša Mangwalo a Bongbodulo wa 2011 (Molao wa bo-8 wa 2011). Karolwana 14 e nyaka go tsenya tšhupetšo go karolo 17 legatong la karolo 48 ya Molao ka Molaong wa Taolo ya Dikhwama tša Bongbodulo bja Meagokabelano.

## **2.15 Karolwana 15**

- 2.15.1 Karolwana 15 e nyaka go fetoša karolo 54 ya Molao. Khuduthamaga ya Mokgatlo wa Boramolao wa Ripaboliki ya Afrika Borwa (LSSA) e kgetha ramolao wa go šoma ka tša mangwalo a bongbodulo yoo a tla thwalwago ke Tona bjalo ka leloko la Boto ya Melawana ya Mangwalo a Bongbodulo bja Meagokabelano. Le ge go le bjalo, LSSA e emetšwe ke boramolao ba babedi ba tša bongbodulo ka Botong ya Melawana ya Lenaneo la Boingwadišo bja Bongbodulo yeo e hlamilwego go ya ka karolo 9 ya Molao wa Boingwadišo bja Bongbodulo. Phetošo ya karolo 54(2)(c)(i) ka karolwaneng 15(a) ya Molaokakanywa e bohlokwa gomme e sepelelana le melawana ya karolo 9 ya Molao wa Boingwadišo bja Bongbodulo.
- 2.15.2 Go a hlokega gore moemedi wa boto a be le tsebo ya go kwagala ya merero ya mabapi le go ngwadišwa ga diyuniti tša bongbodulo bja meagokabelano, le go bulwa ga mananeo a boingwadišo bja mangwalo a bongbodulo. Go tsenywa ga karolo 54(2)(c)(vii), bjalo ka ge go šišintšwe ka karolwaneng 15(c) e nyaka go šoma ka taba ye ka go kgonagatša go thwalwa ga mongwadiši wa mangwalo a bongbodulo, motlatšamongwadiši wa mangwalo a bongbodulo goba mothušamongwadiši wa mangwalo a bongbodulo yoo a nago le tsebo yeo e kgwagalago, go ba leloko la boto. Phetošo e sepelelana gape le melawana ya karolo 9 ya Molao wa Mananeo a Boingwadišo bja Bongbodulo.
- 2.15.3 Karolo 54(2)(c)(i) ya Molao e bolela ka Khuduthamaga ya Mokgatlo wa Boramolao. Karolo 118 ya Molao wa Mošomo wa Boramolao wa 2014 (Molao wa bo-28 wa 2014) ("LPA"), e thomile go šoma ka la 1 Nofemere 2018. Karolo 4 ya LPA e hlamile Lekgotla la Mešomo ya Boramolao la Afrika Borwa leo dinapo tša lona di akaretšago tšweletšopele le tšhireletšo ya dikgahlego tša setšhaba mmogo le go laola bašomi ka moka ba tša molao. Karolo 118 ya LPA e kgontšha tlhathollo le tšhupetšo go melao ye itšego, go ya le ka dikgonagatšo tša LPA. Karolo 118(e) ya LPA le yona e hlaloša gore tšhupetšo go Mokgatlo wa Boramolao wa Afrika Borwa yeo e dirilwego ka molaong ofe goba ofe o tlošitšwego ke LPA e swanetše go tšewa bjalo ka tšhupetšo go Lekgotla la Mešomo ya Boramolao la Afrika Borwa. Le ge e le gore Molao ga se wa tlošwa ke LPA, re tlošitše tšhupetšo go



Khuduthamaga ya Mokgatlo wa Boramolao gomme legatong la yona ra tsenya Lekgotla la Mešomo ya Boramolao la Afrika Borwa bjalo ka ge le hlamilwe ke LPA.

2.15.4. Karolwana 15(b) e nyaka go fetša karolo 54(2)(c) ya Molao go tloša molawana wa gore boto e akaretše batho ba babedi bao ba nago le tsebo ye ikgethilego ya dikhwama tša tšhabollo ya mangwalo a bongbodullo bja meagokabelano. Molawana wo ga o sa le bohlokwa ka ge Molao wa Taolo ya Dikhwama tša Bongbodulo bja Meagokabelano wa 2011 (Molao wa bo-8 wa 2011) bjale o bea melawana le go laola dikhwama tša bongbodulo bja meagokabelano.

2.15.5. Mabaka ao a amegago go thwaleng ga maloko a boto a swanetše a ame le go thwalwa ga malokotlaleletšo a boto. Go tsenywa ga karolo 54(9A) bjalo ka ge go šišintšwe ka karolwaneng 15(d) ke kgato e bohlokwa.

## **2.16 Karolwana 16**

Karolwana 16 e nyaka go kgonagatša tlaleletšo ya karolo 55(2) gore e kgonagatše go phatlalatšwa ga Melawana ka *Kuranteng ya Mmušo* bonnyane gatee ka kgwedi pele ga ge letšatšikgwedi leo le hlalositšwego ka tsebišong ya maleba le eba lona letšatši la go thoma go šoma.

## **2.17 Karolwana 17**

Karolwana 17 e na le thaetlele e nnyane.

### **3. DIKAMEGO TŠA DITŠHELETE GO MMUŠO**

Ga di gona.

### **4. DIKGORO / DITHEO / BATHO BAO GO RERIŠANWEGO LE BONA**

Law Society of South Africa  
 South African Council for the Architectural Profession  
 South African Council for Professional and Technical Surveyors  
 Banking Association of South Africa  
 Institute of Estate Agents of South Africa  
 National Association of Managing Agents

## 5. DIKAMEGO TŠA MOLAOTHEO

Ga di gona.

## 6. DIKAMEGO TŠA KGOKAGANO

Di tla dirwa ke Kgoro ya Temo, Peakanyoleswa ya Naga le Tlhabollo ya Dinagamagae.

## 7. TSHEPEDIŠO YA PALAMENTE

7.1 Palamente e filwe maatla a bolaodi bja melao ya bosetšhaba gomme e na le maatla a semolao a go phethagatša Molaokakanywa.

7.2 Ka go *Tongane v Minister of Agriculture and Land Affairs*, 2010 (6) SA214 (CC), Kgorotsheko ya Molaotheo e ahlotše mabapi le teko yeo e tlo šomišwago ge go bewa Molaokakanywa ka magoro. Kgorotsheko e hlalositše, ka temaneng 70 ya kahlolo yeo gore “teko ya go laela ka moo Molaokakanywa o swanetšego o beiwe ka magoro ka gona e swanetše e nabe go feta teko ya go lekola bokgoni bja molao”. Kgorotsheko e boletše gore teko ya tekolo e beile šedi ditlhalošong ka moka tša Molaokakanywa gore e kgone go bona ka mokgwa woo e amago dikarolo tša mošomo tšeo di lego ka Šetulung 4 ka Molaotheong, e sego feela go bona ge eba tlhalošo efe goba efe ya yona e a amega.

7.3 Re tšee tše mabaka ka moka a ka gare ga Molaokakanywa hlogong go lebeletšwe Setulu 4 le 5 go Molaotheo, gomme ra hwetša gore maikemišetšo le seabe sa Molaokakanywa ga a šomane gabotse le merero yeo e ngwadilwego ka Šetulung 4 goba 5 ya Molaotheo. Nepokgolo ya Molaotheo ke go tšwela pele go kgontšha merero yeo e sepelelanago le mangwalo a bongbodulo bja meagokabelano le go ngwadišwa ga ona.

7.4 Baeletši ba Mmušo go Tša Molao mmogo le Kgoro ya tša Temo, Peakanyoleswa ya Naga le Tlhabollo ya Dinagamagae ba akanya gore Molaokakanywa wo go swanetše go phethagatšwa go ya ka tshepedišo yeo e hlamilwego ka karolo 75 ya Molaotheo ka ge Molaokakanywa o sa hlaloše merero yeo e ngwadilwego ka Šetulung 4 le 5 tša Molaotheo gabotse.

**7.5** Baeletši ba Mmušo go Tša Molao mmogo le Kgoro ya tša Temo, Peakanyoleswa ya Naga le Tlhabollo ya Dinagamagae ba akanya gore ga go hlokege go fetišetša Molaokakanywa wo go Ntlo ya Bosetšhaba ya Baetapele ba Setšo go ya ka karolo 18(1)(a) ya Molao wa Tlhamego ya Boetapele bja Setšo le Pušo wa 2003 (Molao wa bo-41 wa 2003).

E gatišitšwe ke ba Creda Communications

ISBN 978-1-4850-0738-8